

26. august 2014

UKA 2014/33

Inatsisartut Sulieriaasianni § 33 naapertorlugu, matumuuna aalajangiiffigisassatut siunnersuut saqqummiuppara:

**Isumaqatigiissuteqartarnermut inatsisip Kalaallit Nunaannut atuuttup nutarterneqarnissaa siunertaralugu, tassa 1994-imi isumaqatigiissuteqartarnermut inatsimmi § 36-ip allanngortinneqarnera kunngeqarfiup peqqussutaa malillugu Kalaallit Nunaanni atortussanngortinneqarnissaa, kiisalu isumaqatigiissuteqartarneq pillugu inatsimmi allannguutit allat pisariaqartut atortussanngortinneqarnissaat siunertaralugu Naalakkersuisut naalagaaffeqatigiinnermi oqartussanut saaffiginninnissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Saxtorph Didriksen, Siumut)

#### **Tunngavilersuut:**

Manna tikillugu pigisanik nalilinnut inatsisinut tunngasuni Kalaallit Nunaanni Danmarkimilu assigiiaarnerusumik inatsisitigut tunngavissaqarnissaq anguniarneqartarpoq, tassa Kalaallit Nunaanni malerugassat, pissutsit immikkorluinnaq ittut pineqartinnagit, Danmarkimi maleruagassat assigiit atuutsinniarneqartarlutik.

Pineqartuni isumaqatigiissuteqartarneq pillugu inatsit (Isumaqatigiissutit inuillu aningaasaatinut pigisanullu tunngasunik aalajangersaaqatigiinneri allat pillugit inatsit nr. 242, 8. maj 1917-imeersoq) tunngaviusumik inatsisaavoq. Inatsimmi qaqugukkut isumaqatigiissutit pinngitsoornatik atuutsinneqartarnerannik aalajangersarneqarpoq.

Inatsit Kalaallit Nunaanni atortussanngortinneqartoq<sup>1</sup>, arlaleriarluni allanngortinneqarsimavoq. Allannguutitulli inatsisini ataasiinnaq peqqussut aqqutigalugu Kalaallit Nunaanni atortussanngortinneqarpoq<sup>2</sup>. Tamatumalu kingunerisaanik Kalaallit Nunaanni Danmarkimilu isumaqatigiissuteqartarneq pillugu inatsisitigut toqqammavissat ullumikkut assigiinngillat.

Inatsimmi assigiinngissutsit ilaat § 36-imi isumaqatigiissuteqarnermi naapertuutinnngitsumik atugassaqartitaanernut tunngavoq. Isumaqatigiissuteqartarneq pillugu inatsimmi suli maani atortinneqartumi § 36 naapertorlugu, atuutitsinermi periutsit naleqqutinnngitsut

---

<sup>1</sup> Inatsit Kalaallit Nunaanni aningaasaatinut inatsisit il.il. atortuulersinneqarnera pillugu inatsist nr. 104, 31. marts 1965-imeersoq aqqutigalugu Kalaallit Nunaannut atortuulersinneqarpoq.

<sup>2</sup> Inuinnarnut pillaaarnermut inatsit, isumaqatigiissuteqartarneq pillugi inatsit. il.il. allanngortinneqarnissaat pillugit inatsit nr. 250, 12. juni 1975-imeersoq. Inatsit Kalaallit Nunaanni aningaasaatinut inatsisit il.il. atortuulersinneqarnera pillugu inatsist nr. 350, 14. juli 1980-imeersoq aqqugalugu Kalaallit Nunaannut atortuulersinneqarpoq.

pissuserissaarnermulluunniit akerliusut atorneqartillugit, isumaqatigiissutaareersoq eqqartuussiviit atorunnaarsissinnaavaat. § 36-ili inatsit nr. 1098, 21. december 1994-meersoq<sup>3</sup> aqputigalugu allanngortinneqarpoq, taannali Kalaallit Nunaanni atorunnaarsinnartitsinnaanngillat, isumaqatigiissutit taassuma nassataanik eqqartuussiviit isumaqatigiissut pissuserissaarnermik aallaaveqanngitsaq tamakkiisumik ilaannakortumilluunniit atorunnaarsinnartitsinnaanngillat, isumaqatigiissutit taamaattumik aamma allannguisinnaapput. Allanngortitsinermilli inatsit Kalaallit Nunaanni peqqussut aqputigalugu allanngortinneqanngimmat, inatsit taanna taamaallaat Danmarkimi atuuppoq.

§ 36-ioqqaartumi – Kalaallit Nunaanni suli atuutsinneqartumi – isumaqatigiissutit tamakkiisumik ilaannakortumilluunniit atorunnaarsitsinerup, tunngavittulli naleqqutinnngitsutut isumaqatigiissuteqarfisamat ajoqusiisinaanera ajornartorsiutaavoq. Pissutsinilu atuuttuni isumaqatigiissutit sivilisumik atuuttuni, akissarsiamillu aalajangersimasumik angissuseqartumik isumaqatigiissuteqarfiusuni, piffissap ingerlanerani akissarsiap naapertuutinnngitsumik annikippallaalartarnerani, tamanna ajornartorsiutaasarpoq.

Taamaammat Kalaallit Nunaanni isumaqatigiissuteqartarneq pillugu inatsimmik, Danmarkimut atuuttumut naapertuuttungortitsilluni nutarterineq, minnerunngitsumik kalaallit suliffeqarfiinut Danmarkimi suliffeqarfinnik isumaqatigiissuteqartartunut iluaqutaassaaq.

### **Siunnersuutit aningaasatigut allaffissornikkullu kinguneqaatai**

Siunnersuutit atortuulersinneqarnerata kinguneranik, allaffissornikkut ingerlatsisut naalagaaffeqatigiinnermi oqartussanik suleqateqarlutik peqqussutissamik siunnersuummik saqqummiunneqartussamik, tusarniaassutigineqartussamik kingornalu Inatsisartunut oqaaseqarfisassanngorlugu saqqummiunneqartussamik suliaqarneq nassatarissavaa. Suliassap allaffissornikut suliarineqarnissaa naatsorsuutigineqarpoq ukiup affaanik sivilisunerussanngitsaq.

### **Ilanngussaq**

Isumaqatigiissuteqartarneq pillugu inatsit Kalaallit Nunaannut atuuttoq aalajangiiffisassatut siunnersuummut ilanngunneqarpoq.

---

<sup>3</sup> Aningaasaatinut pigisanullu nalilinnut tunngasunut inatsisip allanngortinneqarneranut inatsit allallu inatsisit.